

Na osnovu člana 14., stav (1) Zakona o javnim preduzećima u Brčko distrikta Bosne i Hercegovine („Službeni glasnik Brčko distrikta Bosne i Hercegovine“, broj: 15/06, 05/07, 19/07, 01/08, 24/08 i 17/16) i člana 9. Odluke o osnivanju Javnog preduzeća „Radio Brčko“ d.o.o., Brčko distrikta Bosne i Hercegovine broj: 01-014-1068/02 od 29.04.2002. godine, Upravni odbor Javnog preduća „Radio Brčko“ d.o.o. Brčko distrikta Bosne i Hercegovine, na Četvrtoj vanrednoj sjednici održanoj dana 29.6.2016. godine, d o n o s i:

STATUT

JAVNOG PREDUZEĆA „RADIO BRČKO“ D.O.O., BRČKO DISTRIKTA BOSNE I HERCEGOVINE

DIO PRVI – OPŠTE ODREDBE

Član 1.

(Osnivanje javnog preduzeća „Radio Brčko“ d.o.o., Brčko distrikt BiH)

Statutom Javnog preduzeća „Radio Brčko“ d.o.o., Brčko distrikta Bosne i Hercegovine (u daljnjem tekstu: Preduzeće) utvrđuje se cilj osnivanja, oblik organizovanja, prava i obaveze, firma i sjedište preduzeća, djelatnosti koje preduzeće obavlja, organizacija preduzeća, zastupanje i predstavljanje, sukob interesa, kapital Preduzeća, organi Preduzeća, stručna tijela, izvještaj o radu, opšti akti, prestanak rada Preduzeća, zaštita životne sredine i druga pitanja iz nadležnosti Preduzeća.

Član 2.

(Cilj osnivanja)

(1) Preduzeće je osnovano radi ostvarivanja sljedećih prava građana Brčko distrikta Bosne i Hercegovine (u daljem tekstu: Distrikt):

- a) pravo na informiranje i zadovoljavanje kulturnih, obrazovnih i drugih potreba;
- b) emitiranje programa izdavanja informacija u novinskom i televizijskom (u daljem tekstu: TV) prenosu od posebnog društvenog značaja za razvoj ove sredine.

(2) Preduzeće izdaje zvučne, video nosače zvuka i slike prema mogućnostima, zatim distribuciju novina, audio i video nosača zvuka na svojim prodajnim mjestima kao i usluge Internet portala.

Član 3.

(Oblik organizovanja)

Preduzeće je društvo sa ograničenom odgovornošću, koje je formirano od radio i TV stanica koje su djelovale na području opštine Brčko:

- a) Javno preduzeće OJRNIP Brčko,
- b) Javne ustanove za informiranje Maoča i
- c) Javno preduzeće „Nove Ravne“ Bijela,

kao jedinstveni i multietnički radio s ciljem obavljanja djelatnosti i sticanja dobiti u obliku društva sa ograničenom odgovornošću.

DIO DRUGI - PRAVA I OBAVEZE

Član 4. (Obaveze preduzeća)

Preduzeće je dužno poslovati u skladu sa Statutom Brčko distrikta BiH, Zakonima Distrikta, dobrim poslovnim običajima i poslovnim moralom.

Član 5. (Odgovornost preduzeća)

- (1) Preduzeće odgovara za svoje obaveze cjelokupnom svojom imovinom.
- (2) Osnivač ne odgovara za obaveze Preduzeća, osim do visine svog uloga.

Član 6. (Prava zaposlenih)

- (1) Zaposleni imaju pravo učestvovati u upravljanju Preduzeća u skladu sa zakonom, Statutom Preduzeća i kolektivnim ugovorom.
- (2) Zaposlenici koji su u organima javne uprave obavljali poslove koji su preneseni u nadležnost javnog preduzeća mogu biti preuzeti kao zaposlenici javnog preduzeća, što se reguliše aktom o osnivanju.

DIO TREĆI - FIRMA I SJEDIŠTE PREDUZEĆA

Član 7. (Naziv i znak preduzeća)

- (1) Preduzeće posluje pod nazivom: Javno preduzeće „Radio Brčko“ d.o.o., Brčko distrikt Bosne i Hercegovine.
- (2) Skraćeni naziv Preduzeća glasi: JP „Radio Brčko“ d.o.o..
- (3) Znak Preduzeća je kvadratnog oblika i u sebi sadrži natpis „RBD“, modifikacijom ispisanom na dva pisma, slova su napisana unutar znaka koji simbolizuje antenski sistem.
- (4) Boje Preduzeća su plava i žuta.

Član 8. (Sjedište preduzeća)

- (1) Sjedište Preduzeća je u Brčko distriktu Bosne i Hercegovine, u ulici Bulevar mira broj 18.
- (2) Sjedište Preduzeća može biti izmijenjeno odlukom Upravnog odbora Preduzeća (u daljem tekstu: Upravni odbor).
- (3) Osnivač Preduzeća je Brčko distrikt BiH.
- (4) Prava osnivača iz stava (3) ovog člana ostvaruje Skupština Brčko distrikta BiH.

Član 9.
(Pečat i štambilj preduzeća)

- (1) Preduzeće ima svoj pečat i štambilj.
- (2) Pečat je okruglog oblika i sadrži tekst naziva firme i sjedište Preduzeća, ispisan ćirilničnim i latiničnim pismom u koncentričnim krugovima. Štambilj je pravougaonog oblika i sadrži naziv firme i sjedište Preduzeća, kao i prostor za upisivanje broja predmeta i datum zavođenja odluke, odnosno akta u djelovodni protokol, ispisan ćirilničnim i latiničnim pismom.
- (3) Pečat i štambilj preduzeća čuva direktor ili osoba koju on zaduži.

Član 10.
(Upotreba jezika i pisma)

U Preduzeću su u ravnopravnoj upotrebi tri jezika (srpski, hrvatski i bosanski) te dva pisma (ćirilnično i latinično).

Član 11.
(Principi na kojima se zasniva obavljanje djelatnosti preduzeća)

- (1) Obavljanje djelatnosti preduzeće iz člana 2. ovog zakona zasniva na sljedećim principima:
- a) jednakom tretmanu i slobodi osnivanja i pružanja usluga,
 - b) transparentnosti,
 - c) zabrani sporazuma javnih preduzeća koji imaju za posljedicu sprečavanje, ograničavanje ili narušavanje konkurencije na tržištu,
 - d) zabrani zloupotrebe dominantnog položaja,
 - e) nadziranju pomoći koju dodjeljuju davaoci državne pomoći davanjem povlastica određenim preduzećima ili proizvodnji određene robe, radi izbjegavanja narušavanja konkurencije,
 - f) preventivnom nadziranju objedinjavanja preduzeća,
 - g) liberalizaciji određenih djelatnosti od opšteg interesa radi sprečavanja razvoja monopolističkih tendencija,
 - h) osiguranju transparentnosti finansijskih odnosa između Brčko distrikta BiH i javnih preduzeća,
 - i) vođenju zasebnih računa, na način da se jasno razgraniče troškovi i prihodi povezani s različitim djelatnostima.

DIO ČETVRTI - DJELATNOST PREDUZEĆA

Član 12.
(Klasifikacija djelatnosti preduzeća)

(1) Djelatnost Preduzeća je upisana u registar preduzeća Osnovnog suda Distrikta shodno standardnoj klasifikaciji djelatnosti utvrđenoj Zakonom o klasifikaciji djelatnosti, kako slijedi:

58.11	Izdavanje knjiga
58.12	Izdavanje imenika i popisa korisničkih adresa
58.13	Izdavanje novina
58.14	Izdavanje časopisa i periodičnih publikacija
58.19	Ostala izdavačka djelatnost
59.11	Proizvodnja filmova, videofilmova i televizijskog programa
59.12	Djelatnosti koje slijede nakon proizvodnje filmova, videofilmova i televizijskog programa
59.13	Distribucija filmova, videofilmova i televizijskog programa
59.14	Djelatnosti prikazivanja filmova
59.20	Djelatnosti snimanja zvučnih zapisa i izdavanja glazbenih zapisa
60.10	Emitiranje radijskog programa
60.20	Emitiranje televizijskog programa
61.10	Djelatnosti žičane telekomunikacije
61.20	Djelatnosti bežične telekomunikacije
61.30	Djelatnosti satelitske telekomunikacije
61.90	Ostale telekomunikacijske djelatnosti
62.03	Upravljanje računalnom opremom i sustavom
63.11	Obrada podataka, usluge hostinga i djelatnosti povezane s njima
63.12	Internetski portali
63.91	Djelatnosti novinskih agencija
63.99	Ostale informacijske uslužne djelatnosti

(2) Preduzeće može promijeniti djelatnost samo uz saglasnost Upravnog odbora.

Član 13. (Zaključivanje ugovora Preduzeća)

(1) Preduzeće zaključuje ugovore i obavlja druge poslove prometa i usluga samo u okviru djelatnosti upisanih u registar preduzeća.

(2) Preduzeće obavlja bez upisa u registar preduzeća i druge djelatnosti u manjem obimu koje služe djelatnosti upisanoj u registar preduzeća, a koje se uobičajeno obavljaju uz te djelatnosti.

Član 14. (Sukob interesa)

Direktor i članovi upravnog odbora ne mogu biti vlasnici, zakonski zastupnici ili zaposleni u bilo kom drugom preduzeću iste ili srodne djelatnosti koje bi moglo biti konkurentno s javnim preduzećem.

Član 15.
(Zapošljavanje u javnom preduzeću)

(1) Zapošljavanje u Preduzeću vrši se putem otvorene konkurencije na osnovu profesionalnih sposobnosti i odražava sastav stanovništva u Brčko distriktu Bosne i Hercegovine.

(2) Procedura zapošljavanja u preduzeću bliže se određuje Pravilnikom o zapošljavanju koji na prijedlog direktora Preduzeća, usvaja Upravni odbor.

DIO PETI - ORGANIZACIJA PREDUZEĆA

Član 16.
(Odluka o unutarnjoj organizaciji)

Unutarnja organizacija propisuje se Odlukom o unutarnjoj organizaciji i sistematizaciji radnih mjesta koju, na prijedlog direktora Preduzeća, donosi Upravni odbor uz saglasnost osnivača.

Član 17.
(Unutarnja organizacija Preduzeća)

(1) Preduzeće je organizirano u sljedećem sastavu:

- a) Radio Brčko i
- b) Dopisni centar za medije sa područja Bosne i Hercegovine.

(2) Jedinice unutar organizacije Preduzeća nemaju svojstvo pravne osobe, a mogu obavljati poslove djelatnosti Preduzeća.

DIO ŠESTI - SUKOB INTERESA

Član 18.
(Klauzula konkurencije)

(1) Direktor i članovi Upravnog odbora ne mogu biti vlasnici, zakonski zastupnici ili zaposlenici u bilo kom drugom preduzeću iste ili srodne djelatnosti koje bi moglo biti konkurentno s Preduzećem.

(2) Zaposlenik koji radi puno radno vrijeme ne može bez odobrenja svog poslodavca za svoj ili za račun treće osobe sklapati poslove iz djelatnosti koja predstavlja konkurenciju njegovom poslodavcu.

DIO SEDMI - KAPITAL PREDUZEĆA

Član 19.
(Osnovni kapital preduzeća)

(1) Osnivački ulog Preduzeća u novcu iznosi 5.000 KM.

(2) Pored osnivačkog uloga, ulozi u stvarima i pravima sastoje se od:

- a) prava svojine na pokretnim stvarima;
- b) novčanih sredstava ostvarenih vršenjem registrirane djelatnosti;
- c) izvora sredstava iz budžeta Brčko distrikta Bosne i Hercegovine i entiteta,
- d) sredstava iz donacija.

Član 20.
(Korištenje sredstava preduzeća)

- (1) Odluku o korištenju sredstava Preduzeća donosi direktor.
- (2) Direktor Preduzeća potpisuje pojedinačne naloge banci o korištenju sredstava, ili osoba koju on ovlasti, uz odobrenje Upravnog odbora.

Član 21.
(Polugodišnji i godišnji obračun prihoda i rashoda)

- (1) Utvrđivanje prihoda, rashoda i rezultata poslovanja vrši se polugodišnjim i godišnjim obračunom, u skladu sa važećim propisima.
- (2) Odluka o utvrđivanju i raspoređivanju dobiti, odnosno pokriću gubitka, na prijedlog direktora Preduzeća, donosi Upravni odbor, nakon usvajanja godišnjeg obračuna.

Član 22.
(Odluka o raspoređivanju dobiti)

- (1) Prijedlog odluke o raspoređivanju dobiti priprema Direktor Preduzeća.
- (2) Prilikom pripreme prijedloga za raspoređivanje dobiti vodi se računa o sljedećim prioritetima:
 - a) pokriću gubitka iz prethodnih godina;
 - b) prioritetima i potrebama tekućeg poslovanja;
 - c) investicijama;
 - d) poboljšanju materijalnog položaja zaposlenih.

Član 23.
(Gubitak poslovanja)

- (1) Prijedlog odluke o pokriću gubitka poslovanja priprema Direktor Preduzeća.
- (2) Ukoliko Preduzeće na kraju godine iskaže gubitak, isti se može pokriti:
 - a) iz obaveznih rezervi;
 - b) povećanjem ili smanjenjem osnovnog kapitala;
 - c) na drugi način utvrđen zakonom, a u skladu s odlukom osnivača.

Član 24.
(Izmirenje tekućih obaveza)

- (1) Za izmirenje tekućih obaveza, Preduzeće može u toku poslovne godine uzimati kratkoročne kredite od poslovnih banaka.
- (2) Odluku o kreditnom zaduženju donosi Upravni odbor.

(3) Kredit iz stava 1. ovog člana ne može se uzimati po kamatnoj stopi koja je iznad tržišnih uslova.

DIO OSMI - ORGANI PREDUZEĆA

Član 25. (Organi upravljanja)

Organi Preduzeća su:

- a) Upravni odbor Preduzeća, kao organ upravljanja;
- b) Direktor preduzeća kao poslovodni organ.

Član 26. (Upravni odbor)

- (1) Gradonačelnik imenuje komisiju iz reda zaposlenih u organima javne uprave Brčko distrikta Bosne i Hercegovine, za izbor kandidata za članove upravnog odbora javnog preduzeća (u daljnjem tekstu: komisija) koja se sastoji od pet članova.
- (2) Komisija raspisuje konkurs za izbor i imenovanje članova upravnog odbora koji se objavljuje u tri dnevna lista dostupna na cijeloj teritoriji Bosne i Hercegovine.
- (3) Članovi upravnog odbora biraju se na osnovu profesionalnih sposobnosti i odražavaju sastav stanovništva Brčko distrikta BiH.
- (4) Komisija utvrđuje da li svi kandidati ispunjavaju uslove konkursa, intervjuiše i ocjenjuje kandidate te utvrđuje rang-listu kandidata koju dostavlja gradonačelniku.
- (5) Gradonačelnik imenuje upravni odbor s rang-liste kandidata koju utvrdi komisija, u roku od 30 dana od dana dostavljanja.
- (6) Odluka o imenovanju članova upravnog odbora javnog preduzeća je konačna i protiv nje se može pokrenuti upravni spor.
- (7) Odluka o imenovanju članova upravnog odbora objavljuje se u „Službenom glasniku Brčko distrikta Bosne i Hercegovine“.
- (8) Postupak izbora članova upravnog odbora mora biti okončan prije isteka mandata dotadašnjim članovima upravnog odbora.
- (9) Komisija iz stava (1) ovog člana donosi poslovnik o svom radu.

Član 27. (Uslovi za imenovanje članova Upravnog odbora)

Članovi Upravnog odbora ne mogu biti:

- a) direktori Javnih preduzeća;
- b) lica koja su u upravnim odborima drugih javnih preduzeća;
- c) direktor drugog preduzeća koje je osnovano ili je u vlasništvu Preduzeća;
- d) lica koja su pravosnažnom sudskom presudom osuđivane za vršenje krivičnih djela i protiv kojih se vodi krivični postupak, osim krivičnih djela iz oblasti saobraćaja.

Član 28.
(Mandat upravnog odbora)

(1) Upravni odbor se imenuje na period od 4 (četiri) godine uz mogućnost ponovnog imenovanja, s tim da isti članovi ne mogu biti imenovani više od 2 (dva) puta uzastopno.

(2) Članovima upravnog odbora mandat prestaje po sili zakona nakon isteka perioda na koji su imenovani.

Član 29.
(Nadležnosti i ovlaštenja upravnog odbora)

(1) Upravni odbor:

- a) usvaja statut javnog preduzeća uz saglasnost osnivača;
- b) usvaja godišnji poslovni plan javnog preduzeća uz saglasnost osnivača;
- c) usvaja dugoročni plan razvoja javnog preduzeća uz saglasnost osnivača;
- d) odlučuje o statusnim promjenama javnog preduzeća (podjela, spajanje i pripajanje), uz saglasnost osnivača;
- e) odlučuje o povećanju i smanjenju kapitala javnog preduzeća, uz saglasnost osnivača;
- f) odlučuje o unutrašnjoj organizaciji javnog preduzeća uz saglasnost osnivača;
- g) vrši izbor i odobrava ugovor zaključen sa eksternim revizorom;
- h) usvaja završni račun koji priprema direktor i dostavlja Skupštini Distrikta na odobrenje.
- i) obavlja druge poslove utvrđene zakonom i drugim opštim aktima Preduzeća.

(2) Direktor Preduzeća sudjeluje u radu Upravnog odbora, bez prava odlučivanja.

(3) Upravni odbor može donijeti odluku o izuzeću Direktora preduzeća od prisustva sjednici.

(4) Članovi upravnog odbora javnog preduzeća iz reda službenika zaposlenih u organima javne uprave i institucijama Brčko distrikta BiH dužni su podnositi kvartalne izvještaje o radu Vladi Brčko distrikta BiH i osnivaču.

Član 30.
(Donošenje odluka upravnog odbora)

(1) Upravni odbor donosi odluke većinom glasova ukupnog broja članova Upravnog odbora.

(2) Odluke Upravnog odbora su punovažne ako su donesene u prisustvu više od polovice ukupnog broja članova Upravnog odbora.

(3) Bliže odredbe o radu Upravnog odbora uređuju se Poslovníkom o radu.

Član 31.
(Direktor Preduzeća)

(1) Direktor predstavlja i zastupa Preduzeće.

(2) Direktor Preduzeća može u okviru svojih ovlasti dati drugoj osobi pismenu punomoć za zastupanje Preduzeća.

(3) Direktor preduzeća je ujedno i glavni urednik.

Član 32. (Imenovanje i mandat direktora)

(1) Direktora Preduzeća imenuje Upravni odbor putem javnog konkursa u skladu sa uslovima propisanim Zakonom o javnim preduzećima u Brčko distriktu BiH, aktom o osnivanju i drugim aktima Preduzeća.

(2) Mandat direktora traje 4 (četiri) godine uz mogućnost ponovnog imenovanja, s tim što ista osoba ne može biti imenovana više od 2 (dva) puta uzastopno.

(3) Postupak izbora direktora mora biti okončan prije isteka mandata dotadašnjeg direktora.

(4) U slučaju da je prije okončanja procedure imenovanja direktora istekao mandat članovima upravnog odbora preduzeća, Skupština imenuje vršioca dužnosti direktora preduzeća.

(5) Vršilac dužnosti direktora preduzeća se imenuje na period do okončanja postupka imenovanja direktora, a najduže 6 (šest) mjeseci

Član 33. (Uslovi za imenovanje direktora)

(1) Za direktora može biti imenovano lice koje ima:

- a) državljanstvo BiH;
- b) najmanje visoku stručnu spremu iz oblasti društvenog ili tehničkog smjera;
- c) najmanje 5 (pet) godina radnog iskustva.

(2) Za direktora ne može biti imenovano lice koje je pravosnažnom sudskom presudom osuđivano za vršenja krivičnih djela i lica protiv kojih se vodi krivični postupak, osim krivičnih djela iz oblasti saobraćaja.

Član 34. (Ovlasti i plata direktora)

(1) Direktor Preduzeća ima sledeće ovlasti:

- a) predlaže osnove politike Preduzeća, program razvoja, dugoročne planove rada i poslovanja;
- b) izvršava odluke osnivača i Upravnog odbora;
- c) odlučuje o zapošljavanju u Preduzeću na osnovu obavezujuće odluke Komisije koju imenuje direktor;
- d) odlučuje o prestanku radnog odnosa i odgovornosti zaposlenika u Preduzeću uz saglasnost Upravnog odbora;
- e) zastupa i predstavlja Preduzeće, odlučuje o korištenju sredstava za tekuće poslovanje;
- f) predlaže opšte akte preduzeća;
- g) odlučuje o drugim pitanjima u skladu sa zakonom i opštim aktima preduzeća.

(2) Plata direktora javnog preduzeća ne može se utvrditi u iznosu većem od plate šefa odjeljenja Vlade Brčko distrikta BiH.

Član 35.
(Razrješenje direktora)

Upravni odbor može razriješiti direktora s dužnosti prije isteka perioda na koje je imenovan i to:

- a) na zahtjev direktora;
- b) ukoliko direktor više ne ispunjava uslove za imenovanje;
- c) ukoliko su ispunjeni drugi uvjeti propisani zakonom i drugim aktima Preduzeća;
- d) Ukoliko direktor ne izvršava obaveze, dužnosti i odluke Upravnog odbora koje su propisane zakonom i drugim aktima Preduzeća.

Član 36.
(Odgovornost direktora)

(1) Direktor odgovara Upravnom odboru za rezultate poslovanja i zakonitost rada Preduzeća.

(2) Direktor Preduzeća, uz suglasnost Upravnog odbora, može određenoj osobi specijaliziranoj za određene pravne poslove, dati prokuru.

(3) Direktor Preduzeća priprema akte iz nadležnosti Upravnog odbora, sprovodi odluke Upravnog odbora i odlučuje o drugim pitanjima iz svoje nadležnosti.

Član 37.
(Imenovanje vršioca dužnosti)

(1) Upravni odbor imenuje vršioca dužnosti direktora do imenovanja novog direktora, a najduže na period do 6 (šest) mjeseci, u slučaju:

- a) ostavke;
- b) smrti;
- c) razrješenja direktora s dužnosti prije isteka perioda na koji je direktor imenovan i
- d) isteka mandata.

(2) Vršilac dužnosti direktora iz stava (1) ovog člana mora ispunjavati uslove propisane za direktora javnog preduzeća.

DIO DEVETI - STRUČNA TIJELA

Član 38.
(Sastav stručnih tijela)

Stručna tijela Preduzeća su:

- a) odgovorni urednik informativno-političkog programa;
- b) odgovorni urednik kulturno-zabavnog programa;
- c) programski odbor.

Član 39.

(Odgovorni urednik informativno-političkog programa)

- (1) Odgovorni urednik informativno-političkog programa nadležan je da:
 - a) vodi uređivačku politiku;
 - b) obavlja druge poslove utvrđene aktima Preduzeća.
- (2) Urednik je odgovoran za svaku informaciju objavljenu putem radija u informativno-političkom programu.

Član 40.

(Imenovanje i razrješenje odgovornog urednika informativno-političkog programa)

- (1) Odgovorni urednik informativno-političkog programa imenuje se na osnovu konkursa na period od 4 (četiri) godine uz mogućnost ponovnog imenovanja.
- (2) Upravni odbor imenuje i razješava odgovornog urednika informativno-političkog programa na prijedlog direktora Preduzeća.

Član 41.

(Uslovi za imenovanje odgovornog urednika informativno-političkog programa)

Odgovornim urednikom informativno-političkog programa može biti imenovano lice koje ima:

- a) završen fakultet društvenog smijera;
- b) pet godina radnog iskustva na poslovima javnog informiranja.

Član 42.

(Odgovorni urednik kulturno-zabavnog programa)

Odgovorni urednik kulturno-zabavnog programa obavlja sljedeće poslove:

- a) vodi uređivačku politiku;
- b) odgovoran je za svaku informaciju objavljenu putem radija u kulturno-zabavnom programu;
- c) obavlja druge poslove utvrđene aktima Preduzeća.

Član 43.

(Imenovanje i razrješenje odgovornog urednika kulturno-zabavnog programa)

- (1) Odgovorni urednik imenuje se na osnovu konkursa na period od 4 (četiri) godine uz mogućnost ponovnog imenovanja.
- (2) Upravni odbor imenuje i razješava odgovornog urednika kulturno-zabavnog programa na prijedlog direktora Preduzeća.

Član 44.

(Uslovi za imenovanje odgovornog urednika kulturno-zabavnog programa)

Odgovornim urednikom kulturno-zabavnog programa može biti imenovano lice koje ima:

- a) završen fakultet društvenog smijera;
- b) pet godina radnog iskustva na poslovima javnog informiranja.

Član 45.

(Programski odbor)

- (1) Programski odbor ima 5 (pet) članova.
- (2) Upravni odbor imenuje članove Programskog odbora na prijedlog direktora.
- (3) Odgovorni urednici sudjeluju u radu Programskog odbora, bez prava odlučivanja.
- (4) Programski odbor bira predsjednika i zamjenika predsjednika iz svojih redova na prvoj konstituirajućoj sjednici.
- (5) Bliže odredbe o radu Programskog odbora uređuju se Poslovníkom o radu.

Član 46.

(Nadležnosti programskog odbora)

Programski odbor nadležan je da:

- a) raspravlja i odlučuje o stručnim pitanjima rada u radiju;
- b) daje direktoru i urednicima stručna mišljenja i prijedloge u vezi programa na radiju;
- c) obavlja druge poslove u skladu sa aktima Preduzeća.

DIO DESETI - IZVJEŠTAJ O RADU

Član 47.

(Dostavljanje jednogodišnjeg izvještaja o radu)

Preduzeće podnosi izveštaj o radu Skupštini Distrikta i Gradonačelniku Distrikta najmanje jednom godišnje.

Član 48.

(Javnost rada)

- (1) Rad Preduzeća je javan.
- (2) Direktor je dužan blagovremno i istinito obavještavati javnost o obavljanju djelatnosti Preduzeća putem javnih glasila, radio i Tv stanica i drugih izvora.
- (3) Preduzeće će informacije o svojoj finansijskoj i organizacionoj strukturi učiniti dostupnim javnosti, putem internet stranice – www.radiobrcko.ba.

Član 49.
(Poslovna tajna)

- (1) Poslovnom tajnom Preduzeća smatraju se:
- a) dokumenti koje direktor proglasi poslovnom tajnom u skladu sa aktima Preduzeća;
 - b) podaci koje organi Preduzeća donose kao povjerljive;
 - c) plan fizičko-tehničkog osiguranja fundusa, objekta i imovine Preduzeća;
 - d) druge isprave i podaci koji su zakonom i opštim aktima utvrđeni kao poslovna tajna;
 - e) podaci iz nadležnosti administrativne oblasti Preduzeća;
 - f) podaci o finansijskom poslovanju Preduzeća.
- (2) Direktor Preduzeća odgovoran je za čuvanje poslovne tajne;
- (3) Svi zaposleni članovi Upravnog ili Programskog odbora dužni su čuvati poslovnu tajnu koji na bilo koji način saznaju za ispravu ili podatke, a koji se smatraju poslovnom tajnom.

Član 50.
(Nadzor nad radom Preduzeća)

Nadzor nad radom Preduzeća, te zakonitosti i provođenju opštih akata obavlja Upravni odbor i osnivač čija prava ostvaruje Skupština Distrikta u skladu sa Zakonom o javnim preduzećima u Brčko distriktu BiH

Član 51.
(Saradnja sa sindikatom)

- (1) Sindikalno organiziranje u Preduzeću je slobodno.
- (2) Preduzeće je dužno osigurati uslove za rad sindikalnog povjerenika u skladu sa zakonom.
- (3) Štrajk u Preduzeću može se organizirati u skladu sa Zakonom o štrajku i Kolektivnim ugovorom.

DIO JEDANAESTI - OPŠTI AKTI

Član 52.
(Statut i drugi opšti pravni akti)

Opšti akti Preduzeća su:

- a) Statut;
- b) Pravilnik;
- c) Poslovnik o radu Upravnog odbora;
- d) odluke.

Član 53.
(Donošenje statuta i drugih akata)

(1) Statut Preduzeća donosi Upravni odbor, uz saglasnost osnivača, u roku od 90 dana od dana upisa Preduzeća u registar kod nadležnog suda.

(2) Statut Preduzeća stupa na snagu danom davanja saglasnosti osnivača na statut i objavljuje se na Oglasnoj ploči radija i službenoj web stranici Radija.

(3) Izmjene i dopune Statuta vrše se u skladu sa odredbama za njegovo donošenje, na prijedlog člana Upravnog odbora ili direktora Preduzeća.

(4) Poslovnike donose organi i tijela Preduzeća kojim bliže uređuju svoj rad.

(5) Opšti akti Preduzeća moraju biti u skladu sa statutom, a stupaju na snagu 8 (osmog) dana od dana objavljivanja na oglasnoj ploči.

(6) Svi opšti pravni akti Preduzeća objavljuju se u „Službenom glasniku Brčko distrikta Bosne i Hercegovine“.

DIO DVANAESTI – PRESTANAK PREDUZEĆA

Član 54.
(Osnove prestanka)

Preduzeće prestaje sa radom:

- a) Odlukom osnivača;
- b) ukoliko su ispunjeni drugi razlozi za prestanak u skladu sa Zakonom o preduzećima Brčko distrikta Bosne i Hercegovine;
- c) Odluku o prestanku Preduzeća donosi Upravni odbor;
- d) Ako Preduzeće prestaje na osnovu odluke suda, postupak likvidacije provodi sud, u skladu sa Zakonom o stečaju, prinudnom poravnanju i likvidaciji u Brčko distriktu BiH.

Član 55.
(Brisanje iz registra)

Preduzeće prestaje brisanjem iz registra nadležnog suda.

DIO TRINAESTI - ZAŠTITA ŽIVOTNE SREDINE

Član 56.
(Primjena propisa o zaštiti životne sredine)

Preduzeće je dužno u svom poslovanju pridržavati se svih propisa koji se odnose na zaštitu životne sredine.

Član 57.
(Poremećaj u poslovanju)

U slučaju poremećaja u poslovanju kojima se ugrožavaju životi i zdravlje ljudi i imovina, osnivač Preduzeća:

- a) razrješava dužnosti članove Upravnog odbora;
- b) mijenja unutarnju organizaciju Preduzeća.

DIO ČETRNAESTI - PRIJELAZNE I ZAVRŠNE ODREDBE

Član 58.
(Primjena propisa)

Na pitanja koja nisu regulirana ovim statutom primjenjuje se Zakon o javnim preduzećima Brčko distrikta Bosne i Hercegovine.

Član 59.
(Stavljanje van snage)

Stupanjem na snagu ovog statuta prestaje da važiti Statut Javnog preduzeća „Radio Brčko“ Brčko distrikt Bosne i Hercegovine d.o.o. od 19.05.2016. godine.


Član 60.
(Stupanje na snagu)

Ovaj statut stupa na snagu danom davanja saglasnosti osnivača.


Broj:01-152/16

DOSTAVITI:

1. Skupštini Brčko distrikta BiH,
2. Gradonačelniku Brčko distrikta BiH,
3. Zamjeniku Gradonačelnika Brčko distrikta BiH,
4. Upravnom odboru JP,
5. „Službenom glasniku Brčko distrikta BiH“,
6. Oglasnoj ploči JP,
7. Arhivi.



PREDSJEDNIK UPRAVNOG ODBORA


EDIN RAŽANICA,
dipl. menadžer sigurnosti